

Inatsisartut suleriaasiat § 37 malillugu, immikkoortoq 1 naapertorlugu matumuuna Naalakkersuisunut apeqqut imaattoq saqqummiuppara:

**Naalakkersuisunut apeqqut:**

**1. Inatsisissamut Siunnersuummi UKA2018/21 saqqummiunneqartumi Ilanngussaq 7-ip imaa allanngortinneqarsinnaanerpa? (Siunnersuut: Nuummi aamma Ilulissani nunanit tamalaanit mittarfiit kiisalu Qaqortumi nunap immikkoortuani mittarfiup sananeqarnissaannut, ingerlanneqarnissaannut aningaasalersorneqarnissaannullu killiliussatut piumasaqaatit pillugit Inatsisartut inatsisaat nr. xx, xx. xxx 2018-imeersoq. Naalakkersuisut danskillu naalakkersuisuisa isumaqatigiissutaat)**

**2. Angallannermut assartuinnermullu isumaqatigiissut Naalakkersuisut nittartagaanni aaneqarsinnaavoq, tassanilu maluginiagassaavoq mittarfissanut tunngatillugu inatsisissamut siunnersuummut Naalakkersuisut Qallunaallu naalakkersuisuisa isumaqatigiissutaat ilaatinneqareersoq. Tamanna eqqorpa?**

**3. Naalakkersuisut uppersarsinnaanerpaat UKA2018-imi Qallunaat naalagaaffianut isumaqatigiissutip tunngaviattigit allanngortinnissaanik immikkut saqqummiussisoqassasoq?**

**4. Inatsisissamut siunnersuut Naalakkersuisut siulittaasuata kiisalu Qallunaat statsministeriata isumaqatigiissutaannik aallaavilik, Demokraatiniit, Inuit Ataqaatigiinniit kiisalu Partii Naleqqamiit tapersorsorneqanngippat, inatsisissamut siunnersuut qanoq isikkoqartillugu saqqummiunniarneqarpa?**

(Inatsisartunut ilaasortaq Pele Broberg, Partii Naleraq)

**Tunngavilersuut:**

Mittarfissat sanaartorneqarnissaannut siunnersuut (UKA2018/21), Demokraatit siulittaasuata Niels Thomsenip nalunaarutigaa inatsisissamut siunnersuut Naalakkersuisut siulittaasuata Kim Kielsenip kiisalu Qallunaat statsministeriata Lars Løkke Rasmussenip isumaqatigiissutaat taama iluseqartillugu taperserniarnagu.

Oqallinnermi nalunaarutigineqarpoq inatsisissamut Siunnersuummi saqqummiunneqartumi Ilanngussaq 7-ip imaa allanngortinneqassasoq Demokraatit piumasaqaataannut naapertuuttunngorlugu.

Mittarfissat sanaartorneqarnissaannut siunnersuutip imaanut tunngatillugu aammaasiit nalornisitsisoqaqqilermat paaserusulluinnarpara kina eqqortumik oqalunnersoq, Naalakkersuisut siulittaasuata imaluunniit Demokraatit siulittaasuata.

**Inatsisartunut ilaasortaq Pele Broberg**

Imaneq 1, Postboks 4120, 3900 Nuuk, E-mail.: [peleb@inatsisartut.gl](mailto:peleb@inatsisartut.gl) Nittartagaq.: [www.partiinameraq.gl](http://www.partiinameraq.gl)  
Oqarasuaatit.: +299 34 50 00 Toqqaannartoq.: +299 34 62 69 Angallattaq.: +299 483536



Nalakkersuisut siulittaasuat siornatigut nalunaareernikuuvoq isumaqatigiissutip imaa allangortinniarlugu isumaqatigiinniartoqaqqissanngitsoq, tassani pineqarluni Naalakkersuisut siulittaasuata kiisalu Qallunaat statsministeriata isumaqatigiissut atsiugaat, taattumillu paaserusuppara isumaqatigiissutip imaa Inatsisartut allangortissinnaaneraat, tassani pineqarluni ilanngussaq 7?

Tamatumunnga atatillugu Naalakkersuisut nittartagaanni allaqqasoq mittarfiit sanaartorneqarnissaannut pilersaarumi ilaasutut naatsorsuutissaanersoq, kiisalu allangortissinnaaneranut periarfissaqqarnersoq?

Oqallinnerup ingerlanerani aamma saqqummiunneqarpoq Demokraatit piumasarigaat ilanngussaq 7 immikkut allangorlugu immikkortut UKA2018/21-imut atatinnagu saqqummiunneqassasoq. Taamaalionermut peqqutaavoq isumaqatigiissut erseqqissumik suliarineqarsimanngimmat, kingunerisassaalu akueriuminaatsinneqarmata, kiisalu folketinimit Inatsisarunillu inaarutaasumik suli akuerineqarsimanngimmata, taamaattumillu allangortinneqarnissaannik siunnersuusiortoqarsinnaalluni.

Naak Demokraatit UKA2018/21 akueralugu taasigaluarlutik, tassanilu ilanngussaq 7 ilaagaluartoq, maluginiarparput naalakkersuisunut illuatungiliuttut Demokraatillu ilanngussaq 7 taama iluseqartillugu akuersaanngikkaat. Taamaatumillu Naalakkersuisut ilanngussamut 7-imut tunngatillugu ikinnerussuteqalerput.

Inatsisissamut siunnersuut ilanngussamik 7-imik tunngavilik qanoq saqqummiunneqassamaarpa? Tassunga atatillugu paaserusunnarpoq Naalakkersuisut Inatsisartuni oqallinnermi saqqunniunneqartut Qallunaat naalagaaffiannut isumaqatigiinniarnermi nutaami ilanngunniarneraat.

Ilanngussaq 7 pillugu oqallinnermi Naalakkersuisut siulittaasuat inimi malinnaavoq. Oqallinnermilu Naalakkersuisoq apeqqarissaarfigineqarnermini paasissutissanik nutaanik allanik, Demokraatit siulittaasuannit saqqummiunneqartunit allaanerusunik saqqummiussa qarani.

Apeqqut ullut sulliviit qulit qaangiutinnagit akineqarnissaa kisaatigaara.

**Inatsisartunut ilaasortaq Pele Broberg**

Imaneq 1, Postboks 4120, 3900 Nuuk, E-mail.: [peleb@inatsisartut.gl](mailto:peleb@inatsisartut.gl) Nittartagaq.: [www.partiinameraq.gl](http://www.partiinameraq.gl)  
Oqarasuaatit.: +299 34 50 00 Toqqaannartoq.: +299 34 62 69 Angallattagaq.: +299 483536